

## **EH Bildu talde politikoa** **Grupo político EH Bildu**

Ijentea, 1 - Tel. 943481027 - [www.donostia.ehbildu.eus](http://www.donostia.ehbildu.eus) -  
20003 Donostia

### **KONTROL MOZIOA,** **COVID-ak Emakumeen Etxean duen eragina dela eta**

EH Bildu udal taldeko zinegotzi Reyes Carrere Zabalak, Udalbatzaren Araudi Organikoaren 98. artikulua oinarri, KONTROL MOZIO hau aurkezten du, COVID-19aren krisiak Emakumeen Etxean duen eraginari buruz, Udalbatzan azter dadin. Mozioa urtarrilaren 11n Pertsonentzako Zerbitzuan Batzordean aztertutako interpelazioaren ondorioa da.

### **JUSTIFIKAZIOA**

Udalbatzak, 2020ko ekaineko osoko bilkuran, aho batez onetsi zuen EH Bilduk aurkeztutako kontrol mozio bat, 2. puntuan hauxe zioena: *“Donostiako Udalbatzak udal Gobernuari hertsatuki eskatzen dio txosten bat egin dezala muga horrek Emakumeen Etxek jardueretan izan dezakeen eraginaz, eta muga horrek zenbat emakumeri eragin diezaikekeen azaltzeko, eta informazio hori Berdintasun Kontseiluari eta Emakumeen Etxeko Elkarteari helarazteko”*.

Hamar hilabete baino gehiago igaro dira ordutik, eta hainbatetan interpelatu dugu Udal Gobernuak, aho batez onetsitako mozio hura bete dezala eskatzeko, alegia: egin dezala diagnostiko bat Emakumeen Etxean dozenaka jarduera eten eta mugatu izanak haren jardueran bertan eta erabiltzaileetan nola eragin duen jakiteko.

Urriko batzordean eskatu genuen txosten hori, eta erantzun zitzaigun abenduan egongo zela eskuragarri. Baina, gure harridurarako, orduan eman zitzaigun gauza bakarra Emakumeen Etxearen ohiko urteko memoria izan zen: bertaratze datuak, erabiltzaileen profila, ordutegiak, konfinamenduaren ondorioz egindako egokitzapenak eta gerora bertaratzeko izan diren mugak... Eraginaren azterlanik ez, ordea.

Urtarrilean, berriz ere, interpelazio bat egin genion Udal Gobernuari, memoria hura sei hilabete lehenago hitzemandakoa ez zela eta. Batzordean, Berdintasuneko zinegotzi ordezkariak barkamena eskatu zuen; akatsa aitortu, eta hitzeman zuen hil horren bukaerarako egongo zela eskuragarri.

Gobernuak, otsailean, beste dokumentu bat eman zigun, baina, gure harridurarako, dokumentu hori, “COVID-19aren krisiak Emakumeen Etxean izan duen eragina” izenburua badu ere, abenduan emandakoaren kopia huts bat besterik ez da. Analisi bat izan beharrean, abenduan emandakoaren nahas-mahas bat da.

Funtsean, oraindik ez dakigu COVID-19aren pandemiaren ondorioz Emakumeen Etxeko jardueretan espazio eta bertaratze aldetik ezarri diren mugek zer eragin izan duten emakume horien bizitzan; nola ari den eragiten entitate horrek jarritako helburuetan, zer ondorio izango dituen etorkizun hurbilean, zenbateraino eragingo dien etorkizuneko bertaratzeei... Eta askoz gutxiago dakigu zer neurri zuzentzaile hartuko

## **EH Bildu talde politikoa**

### **Grupo político EH Bildu**

Ijentea, 1 - Tel. 943481027 - [www.donostia.ehbildu.eus](http://www.donostia.ehbildu.eus) -  
20003 Donostia

diren urtean 35.000 emakumeri kasu egiten dien zerbitzu hori pixkanaka ahultzen joan ez dadin.

Beste behin, Udal Gobernu hau beste alde batera begira jartzen da, Emakumeen Etxea hobetzea denean kontua. Bien bitartean, martxoaren 8 guztietan, adierazpen erraz eta hutsak egiten ditu gizonen eta emakumeen desberdinkeria borrokatzearen alde, eta azaroaren 25 guztietan, genero indarkeriaren kontra agertzen da.

Ekintzen unea da, eta ez hitzen unea; gaur egungo errealitateari egokitutako estrategia feministak ezartzeko unea da; giza baliabide eta material gehiago jartzeko unea, Emakumeen Etxearen milaka erabiltzaileek aurrez aurre egin ahal izan ditzaten jarduerak.

Horregatik guztiarengatik, hauxe da behean sinatzen duen zinegotziak aurkeztutako

### **KONTROL MOZIOA**

1.- Donostiako Udalbatzak hertsatuki eskatzen dio Udal Gobernuari premiaz egin dezala pandemia Emakumeen Etxearen jardueretan izaten ari den eraginari buruzko diagnostiko bat, argi adieraziko duena espazioaren muga zer ondorio izaten ari den erabiltzaileentzat, nola ari den egoera hau emozionalki eragiten, eta zer estrategia ezarriko dituen gobernu honek, egoera honek irauten duen bitartean errealitate izan daitezen mugimendu feministaren ahalduntze eta indartze helburuak eta emakumeen eta gure hiriko desberdinkeria amaitzeko borrokan diharduten elkartearen artean sinergiak sortzeko helburuak.

Donostian, 2021eko ekainaren 18an



**EH Bildu talde politikoa**  
**Grupo político EH Bildu**

Ijentea, 1 - Tel. 943481027 - [www.donostia.ehbildu.eus](http://www.donostia.ehbildu.eus) -  
20003 Donostia

Reyes Carrere Zabala  
**concejala del grupo municipal EH Bildu**